

**Raajat qalipaap atorlugit kitin/kitosanimik rejemelinillu nunatta iluani nunattalu avataanut tunisassiorsinnaasumik pisortanit namminersortunillu pigineqataaffiusumik tunisassiorfimmik, imminut akilersinnaasumik pilersitsisoqarsinnaanersoq paasiniallugu, Naalakkersuisut Ukiakkut Ataatsimiinnermi 2017-mi agguassassamik nalunaarusiornissaannik peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasorta Peter Olsen, Inuit Ataqatigiit)

### **Akissuteqaat**

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

### **Siullermeerneqarnera**

Siullermik Inatsisartunut ilaasortamut Peter Olsenimut aalajangiiffigisassatut siunnersuut manna saqqummiussimammagu qutsavigaara.

Siunnersuuteqartup raajat qalipaap kitosan atorlugit tunisassiorsinnaaneq pillugu aalajangersimasumik allaaserinnippoq isumassarsiaq pitsaasuusinnaasoq, qinnutigalugulu, taamatut tunisassiorsinnaasumik pisortanit namminersortunillu pigineqataaffiusumik tunisassiorfimmik, imminut akilersinnaasumik pilersitsinissamut tunngavissaqarnersoq paasiniallugu, Naalakkersuisut kingusinnerpaamik UKA2017-imi saqqummiunneqartusamik misissueqqullugit.

Naalakkersuisut paatsuungasoqaaqqunagu maluginiarpaat siunnersuuteqartoq paasissutissat nutaangitsorujussuit tunngavigalugit saqqummiussaartoq, piffissallu ingerlanerani annertuumik allangortoqarsimasinnaavoq. Kisianni misissuinissaq maani nunatsinni raajat qalipaap kitosan atorlugit tunisassiornerup pilersinnissaanut periarfissat suliffeqarfiit attuumassuteqartut suliffeqarfiillu ilisimasallit suleqatigalugit Naalakkersuisut ingerlakkusuppaat.

Inuussutissarsiutit ineriartornerat aallaaviatigut namminersortut ineriartortitsinerattut pissasoq Naalakkersuisut politikkerat. Siunnersuuteqartup pisariaqartumik aningaasaliinissap annertussuseqarnissaa 13 – 14 mio. kr.-inut nalilerpaa. Taamaattumik malitsiinnarlugu nalinginnaasumik namminersortut piginnittuusinnaanera periarfissaavoq, Namminersorlutillu Oqartussat peqataanerat inissaminiissorinarani.

Naalakkersuisunit aamma oqaatigineqassaaq Ilulissani Royal Greenlandi raajat qalipaap atorlugit ingerlataqarmat, ingerlatseqatigiiffiillu ukiuni arlalissuarni taama ingerlataqarni ineriartortissimammagu. Taamaattumik raajat qalipaap annertungaatsiartumik

atorluarneqareerput. Oqaatigineqareersutulli kitosan atorlugu ingerlataqarsinnaanermut periarfissat qanimut Naalakkersuisut assut suli misissorusuppaat.

Tamanna tunngavigalugu siunnersuutip aalajagiiffigineqarnissaa Naalakkersuisut inassutigaat.